

სსიპ „კულტურის, სპორტისა და ახალგაზრდულ საქმეთა სააგენტო“

„სპორტულ ინიციატივათა მხარდაჭერის“ პროგრამის

(პროგრამის კოდი: 06 27 03)

განხორციელების წესი

მუხლი 1. ზოგადი დებულება

1. ეს წესი განსაზღვრავს აფხაზეთის ავტონომიური რესპუბლიკის ბიუჯეტის ასიგნებებით გათვალისწინებული „სპორტულ ინიციატივათა მხარდაჭერის“ პროგრამის (კოდი: 06 27 03) განხორციელების პირობებს და პროცედურებს.
2. ამ წესის შესაბამისად, პროექტის დაფინანსების მიზნით, სსიპ „კულტურის, სპორტისა და ახალგაზრდულ საქმეთა სააგენტო“ (შემდგომში - სააგენტო) ქმნის განაცხადის განმხილველ კომისიას (შემდგომში - კომისია), რომელიც განიხილავს შემოსულ განცხადებებს და შეარჩევს დაფინანსებისთვის.
3. კომისიის შემადგენლობა მტკიცდება სააგენტოს დირექტორის ბრძანებით.

მუხლი 2. დაფინანსების მიმღები სუბიექტი

1. დაფინანსების მიმღები სუბიექტი შეიძლება იყოს, საქართველოს კანონმდებლობის შესაბამისად, საქართველოს ტერიტორიაზე რეგისტრირებული იურიდიული პირი (სპორტული ორგანიზაციები, სპორტული ფედერაციები, სპორტული კლუბები, სპორტული ასოციაციები, სპორტული სხვა დაწესებულებები, საზოგადოებრივი და ახალგაზრდული ცენტრები).

მუხლი 3. განაცხადის წარდგენა

1. დაფინანსების მისაღებად, საქართველოს კანონმდებლობის შესაბამისად, საქართველოს ტერიტორიაზე რეგისტრირებულმა იურიდიულმა პირმა წერილობითი განცხადებით უნდა მიმართოს სააგენტოს, რომელსაც უნდა ერთვოდეს: სრულყოფილად შევსებული საპროექტო განაცხადი, რომლის ფორმასაც ამტკიცებს სააგენტოს დირექტორი.
2. საპროექტო განაცხადი ორიენტირებული უნდა იყოს სპორტული სხვადასხვა სახეობის პოპულარიზაციაზე, კერძოდ:
 - 2.1 აფხაზეთიდან დევნილი მოსახლეობის, სპორტსმენების, მწვრთნელების, გუნდების, კლუბების ადგილობრივ (ტურნირებში, ჩემპიონატებში, სპორტულ ღონისძიებებში) და საერთაშორისო შეჯიბრებებში მონაწილეობა და ფინანსური მხარდაჭერა, მსაჯთა და სპორტსმენთა მონაწილეობა სემინარებში.
 - 2.2 დევნილი ახალგაზრდების სპორტულ ცხოვრებაში აქტიურად ჩართულობის გაზრდის მიზნით, სხვადასხვა სახეობებში სპორტული კლუბების მიერ წარმოდგენილი

პროექტების ხელშეწყობა, სპორტსმენთა ეკიპირებითა და სპორტული ინვენტარით უზრუნველყოფა პროექტის ფარგლებში;

2.3 სპორტის სხვადასხვა სახეობის პოპულარიზაცია შეზღუდული შესაძლებლობის მქონე პირებში.

3. საპროექტო განაცხადის ფორმას და წარსადგენი დოკუმენტების ნუსხას განსაზღვრავს სააგენტო.

4. სააგენტო ამოწმებს საპროექტო განაცხადის შესაბამისობას განაცხადისათვის დადგენილ ფორმასთან და ამ წესთან.

5. თუ, დაინტერესებული სუბიექტის მიერ წარმოდგენილი განაცხადი არ შეესაბამება დადგენილ მოთხოვნებს ან/და არ არის წარმოდგენილი სააგენტოს მიერ განსაზღვრული დოკუმენტაცია, სააგენტო დაინტერესებულ სუბიექტს ხარვეზის გამოსასწორებლად განუსაზღვრავს გონივრულ ვადას.

6. სააგენტოს მიერ განსაზღვრულ ვადაში ხარვეზის გამოსწორებლობის შემთხვევაში განაცხადი ვერ გადავა განხილვის შემდეგ ეტაპზე, რაზედაც ეცნობება განმცხადებელს.

მუხლი 4. განაცხადის განხილვა და დაფინანსება

1. წარმოდგენილი საპროექტო განაცხადის ამ წესით და მოქმედი კანონმდებლობით დადგენილ მოთხოვნის შესაბამისობას ამოწმებს სააგენტო და ხარვეზების არარსებობის შემთხვევაში განსახილველად წარუდგენს კომისიას.

2. განაცხადის განხილვისას და დაფინანსების ოდენობის განსაზღვრისას, მხედველობაში მიიღება განაცხადის შესაბამისობა ამ წესით დადგენილ პრიორიტეტებთან, პროექტის დასაბუთებულობა და ინტელექტუალური ღირებულება, აგრეთვე, განმცხადებლის გამოცდილება და უნარი განახორციელოს წარდგენილი პროექტი.

3. თუ წარდგენილი განაცხადით მოთხოვნილი თანხა აღემატება 15 000 (თხუთმეტი ათასი) ლარს, განაცხადის დადებითად შეფასების შემთხვევაში კომისია განაცხადის დაფინანსების შესახებ (თანხის ოდენობის მითითებით), რეკომენდაციით მიმართავს სააგენტოს დირექტორს, რათა მან აღნიშნული პროექტი ინფორმირებისთვის წარუდგინოს მაკონტროლებელს - აფხაზეთის ა/რ განათლებისა და კულტურის სამინისტროს.

4. განაცხადის განხილვისას მხედველობაში მიიღება პროექტის ბიუჯეტის ოპტიმალურობა, თანადაფინანსების არსებობა და მოხალისეობრივი ჩართულობა.

5. კომისია წარმოდგენილ მასალებსა და გარემოებებზე დაყრდნობით აფასებს პროექტის წარმატებით განხორციელების წინაპირობებს.

მუხლი 5. დაფინანსების გაცემა

პროექტის დაფინანსება განხორციელდება სააგენტოს დირექტორის ბრძანებით (ინდივიდუალური ადმინისტრაციულ-სამართლებრივი აქტი), რომლის საფუძველს წარმოადგენს კომისიის მიერ მიღებული დამოუკიდებელი, დადებითი გადანვეტილება (საოქმო გადანვეტილება).

მუხლი 6. ხელშეკრულების დადება

1. სააგენტოსა და დაფინანსების მიმღებ სუბიექტს შორის პროექტის განხორციელებასთან დაკავშირებული საკითხები წესრიგდება მხარეებს შორის გაფორმებული ხელშეკრულებით.
2. ამ მუხლის პირველი პუნქტით გათვალისწინებული ხელშეკრულების დადების საფუძველია კომისიის გადაწყვეტილების საფუძველზე, სააგენტოს დირექტორის მიერ გამოცემული ინდივიდუალური ადმინისტრაციულ-სამართლებრივი აქტი, პროექტის დაფინანსების ან თანადაფინანსების შესახებ.
3. ხელშეკრულების დადების, შეცვლის, შეჩერებისა და შეწყვეტის წესი რეგულირდება საქართველოს მოქმედი კანონმდებლობით.
4. ობიექტური მიზეზებიდან გამომდინარე ან/და ფორსმაჟორულ შემთხვევებში, სააგენტოსა და დაფინანსების მიმღებ სუბიექტს შორის გაფორმებულ ხელშეკრულებაში თანხის, ღონისძიების ადგილის, ვადების ან სხვა არსებითი პირობების ცვლილება განხორციელდება ხელშეკრულებით გათვალისწინებული შეთანხმების თანახმად.

მუხლი 7. თანხების ხარჯვის შესახებ ანგარიშის წარდგენა და კონტროლის განხორციელება

1. ამ წესის ფარგლებში მიღებული გადაწყვეტილებებისა და პროექტის შესრულების კონტროლს ახორციელებს სააგენტო, წინასწარ განსაზღვრული მონიტორინგის მექანიზმებით:
 - ა) სააგენტო უფლებამოსილია განახორციელოს მონიტორინგი პროექტის მიმდინარეობის ნებისმიერ ეტაპზე;
 - ბ) სუბიექტი ვალდებულია პროექტის დასრულების შემდეგ წარმოადგინოს ჩატარებული სამუშაოს ანგარიში;
 - გ) სუბიექტი ვალდებულია წარმოადგინოს პროექტის ამსახველი ფოტო ან ვიდეო მასალა.
2. დაფინანსების მიმღები სუბიექტი ვალდებულია (ღონისძიების დასრულების შემდგომ, არაუგვიანეს 20 (ოცი) სამუშაო დღისა, წარადგინოს მიზნობრივი ხარჯვის დამადასტურებელი დოკუმენტაცია და ინფორმაცია, სააგენტოს დირექტორის ბრძანებით დამტკიცებული, „პროექტების შესრულების ანგარიშის ფორმის“ შესაბამისად.
3. ამ მუხლის მეორე პუნქტით გათვალისწინებულ ვადაში ხარჯვის დამადასტურებელი, შესაბამისი დოკუმენტის წარმოდგენილობის შემთხვევაში არ ანაზღაურდება სააგენტოს მიერ.
4. ფინანსური ანგარიში წარმოდგენილი უნდა იქნეს ხელშეკრულების შესაბამისად.

მუხლი 8. დაფინანსების ადმინისტრირება

1. სააგენტო უფლებამოსილია განაცხადების დაფინანსება გასცეს ეტაპობრივად.
2. დაფინანსების მიმღები სუბიექტი ვალდებულია განახორციელოს ფინანსების ხარჯვა მიზნობრივად, სააგენტოსა და იურიდიულ პირს შორის გაფორმებული ხელშეკრულების შესაბამისად.

3. დაფინანსების მიმღები სუბიექტი უფლებამოსილია მიმართოს სააგენტოს წერილობით, ბიუჯეტის პუნქტებს შორის თანხების გადანაწილების თაობაზე, რაც გაფორმდება შეთახმების აქტით.

მუხლი 9. ანგარიშსწორება

1. დაფინანსების მიმღებ სუბიექტს თანხა გადაერიცხება ეროვნულ ვალუტაში - ლარში.
2. დაფინანსების მიმღები სუბიექტის მიერ წარმოდგენილ ხარჯთაღრიცხვაში (მთლიანად ან ცალკეულ პუნქტებში) უცხოური ვალუტის (ლართან მიმართებით) სავარაუდო გაცვლითი კურსის მითითების შემთხვევაში, აღნიშნულის გათვალისწინებით, სააგენტოს მხრიდან დაფინანსების მიმღებ სუბიექტს იურიდიულ პირს შესაბამის ანგარიშზე ჩაერიცხება მის მიერ მოთხოვნილი საერთო თანხა ლარში (იმ დროისათვის ეროვნული ბანკის მიერ არსებული გაცვლითი კურსის შესაბამისად).